

HE TIKANGA NA TE HUI O TE HAHĪ .  
MAORI O TURANGA.

HE TIKANGA.

Ingoa.

MO NGA MAHI A NGA PARIHA.

Kua takoto nei he tikanga i roto i te Ture IV. a te Hinota Nui, kia rua nga Watena mo ia Pariha, mo ia Pariha : ma te Minita tetahi e whiriwhiri, ma nga tangata o te Pariha tetahi, i ia tau, i ia tau, i roto i nga tangata o te Pariha e pa ana ki te Hapa a te Ariki ;

Kua takoto ano tetahi tikanga i roto i taua Ture kia whai Komiti nga Pariha katoa ; nga tangata o te Komiti, ko nga Watena tokorua, ko etahi hoki o nga tangata Kai-Hapa o te Pariha, he mea whiriwhiri hei tangata Noho-Komiti, i ia tau, i ia tau, e nga tangata o te Pariha :

Kua oti hoki te tuku mai hei mahi ma tenei Hui o te Hahi Maori te whakatakoto tikanga mo te whiriwhiri i nga Watena, i nga Tangata Noho-Komiti mo ia Pariha, mo ia Pariha, te whakaatu hoki i te mahi ma nga Watena, ma nga Komiti :

Me whakatakoto e tenei Hui enei tikanga e takoto atu nei ara ;

1. Ko te whiriwhiringa i te Watena, me nga Tangata Noho-Komiti, kia takoto i roto i te Marama i a Tihema, i ia tau, i ia tau. Ko te ra, ma te Minita e karanga. Ki te kore e oti te whiriwhiri a tetahi Pariha i te Watena, i nga Noho-Komiti, i roto i nga ra o Tihema, kia hohoro ano te whiriwhiri i muri iho i aua ra. Ko te tutukitanga o te wa e whakaturia ai aua tangata nei hei Watena, hei Noho-Komiti, ko te 31 o nga ra o Tihema.

2. Ko te taima me te wahi e huihui ai nga tangata o te Pariha ki te whiriwhiri i te Watena, i nga Tangata Noho-Komiti, me panui ki roto ki te Whare-Karakia i te Ratapu i mua tonu ake o te ra e karangatia ana hei huihuinga.

3. Nga tangata mana e whiriwhiri te Watena me nga Tangata Noho-Komiti, ko nga tane katoa o te Pariha, kua tae nei o ratou tau ki te 21, kua oti ano hoki te tuhituhi e tenei, e tenei, tana whakaatu mona, ara, he tangata ia no te Hahi o Ingarani.